



Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaanik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (Siulittaasoqarfimmi ilaasortat)

(Siullermeenera)

Demokraatiniit nuannaarutigeqaarput nunami maani ingerlalluartumik demokratiimik pilersitsinnaasimagatta innuttaasut tamarmik kiffaangissuseqarlutik naligiillutillu taasisinnaaffiannik. Killiligaanani oqaaseqarsinnaatitaallutik, Killiligaanani kattuffilorsinnaatitaallutik. Killiligaanani katersuuffiusinnaasumik. Aammalu kiffaangissuseqartunik namminersortunillu tusagassaqartitsivilimmik.

Allatut oqaatigalugu inuiaqatigiit pilersissinnaasimavagut, demokraatiskimik tunngavillit ajoquserneqarsinnaangitsunik. Pilersissimavagut inuiaqatigiit demokratiskiusut. Tamanna qaqumulluunniit paarisariaqartipparput. Tamannalu tunngavigalugu pingaaruteqarpoq akerlilersuisarnissarput arlaata demokratii tunngavigisarput aserorterniarsarilissagaluarpagu.

Una siunnersuut assersuutaavoq naatsumik oqaatigalugu demokratiimik innarliisussa. Siunnersuuteqartup tamanna ilisimasariaqaraluarpa aamma Demokraatini kaammattuutigissavarput siunnersuut sukkanerpaamik tunuartinneqassasoq qaqugorsuarmullu saqqummiunneqaqqinngisaannarluni.

Siunnersuut toqqaannartumik eqquinerlunneruvoq inuiaqatigiinnut demokratiskiusunut.

Siunnersuummi siunertaavoq Inatsisartut Siulittaasoqarfiata KNR naalakkissagaa Inatsisartut ataatsimiittarfianni ataatsimiinnernik toqqaannartumik aallakaatitsisaleqqullugu. Allatut oqaatigalugu Siulittaasoqarfiup aalajangerniarsaraa, tusagassaqartitsiviup kiffaangissuseqartup namminersortullu aallakaatitsivissani piffissaq sumut atussaneraa. Tamanna tupinnaqaaq.

Demokratimi tusagassaqartitsiviit namminneq aalajangertarpaat piffissaq aallakaatitsivissartik sunik sumillu immissanerlugu, oqaaseqaat ilaqittariaqanngilarluunniit. Tupinnaqaaq politikikkikut pinngitsaaliiniarsarisooqarmat KNR-p suut aallakaatitassaneraa.

Siulittaasoqarfiup tunngavilersuutiginiarsaraa, KNR-p pisussaaffeqareersoq upalungaarsimanermit pingaaruteqartunik aallakaatitsisarnissani kiisalu inuiaqatigiinnut paasissutissiarnissani innuttaasunut naliginnaasumik soqutiginaatilinnik.

Siulittaasoqarfik ilumut isumaqarnerluni maani inimi ataatsimiinnernik aallakaatitsisarnissaq sakkortuumik



anorersuarnissaanut ilimasaarummut assersuunneqarsinnasoq? Siulittaasoqarfik ilumut isumaqarnerluni maani inimi ataatsimiinnernik aallakaatitissarnissaq assersuunneqarsinnaanersoq innuttaasut isumannaatsuulluinnarnissaat pillugu iliutsimut? Ilumut tamakku tunngavilersuummut naleqquppat?

Tunngavilersuut paasisaanngilaq. Demokraatiniit tupigusoqaagut, Siulittaasoqarfiup takusinnaanngimmagu siunnersuut demokratiimik innarleerujussuarsinnaasoq. Inuiaqatigiit demokratiskiusut tusagasaqartitsivimminnut naalakkiineq ajorput politikikkut ataatsimiinnernik aallakaatitseqqusullutik. Kialluunniit tamanna paasisinnaasariaqaraluarpaa.

Tusagasaqartitsiviit kiffaanngissuseqartut namminersortullu nammineq aalajangertarpaat suut aallakaatissanerlugit - politikkerit sulissarinngilaat tusagasaqartitsinnut kiffaanngissuseqartunut namminersortunullu naalakkiisarnissaq.

Qularinngilara oqartoqassaqaartoq, KNR-i innuttaasunut sullissinissaminut isumaqatigiissuteqartoq, tassanilu immikkoortut ersarissarneqarnikuupput KNR-p pisussaaffeqarfii. Taava tamanna politikikkut akulerunnerunngila? akissut naamiuvoq. Assigiinngissut ersarissoq tassaavoq innuttaasunut kiffartuussinissamut isumaqatigiissummi pineqartarmat radiokkut tv-kkullu assigiinngiiaartunik aallakaatitsisoqartarnissaa, immikkoortulli assigiinngitsut qanoq aaqqissuunneqassanersut 100 procentimik KNR-mit aalajangerneqartussaapput.

Mannali siunnersuut aqcutigalugu Siulittaasoqarfik qaangerujussuarniarpoq. Manna siunnersuut atorlugu Siulittaasoqarfiup naalakkiutiginiarpaa KNR-i sunik aallakaatitsisassanersoq - tassalu Inatsisartut ataatsimiinnerannik aallakaatitsisassasoq.

Oqareernitsituut siunnersuut inuiaqatigiinnut demokratiskiusunut kalluaaneruvoq aamma Demokraatini neriuutigeqaarput inimi maani partiit tamarmik una siunnersuut demokratiskiuunngivissoq itigartilluinnarumaaraat.

KNR maani inimi ataatsimiinnerniit aallakaatitsissappat, taava aalajangiisussatuaavoq KNR-i - tusagasaqartitsivimmilu kiffanngissuseqartumi namminersortumilu aalajangernissaq politikkerit naalakkiutigissanngilluinnarqissaarpaat. Tamanna inuiaqatigiinnut demokratiskiusunut tulluanngilaq.

Demokraatini inassutigaarput siunnersuut itigartinneqassasoq.